

खबरां सोनाली दत्ता कोला

- प्रधानमंत्री नरेंद्र मोदी होर न्यूजीलैंड दे प्रधानमंत्री हुंदे कन्नै गल्लबात करने लेई अपनी 2 दिनें दी जातरा पर आकलैंड पुज्जे।
- केंद्र सरकार नै बद्द मात्रा च नशीले पदार्थ होने आहिलियां दोआइयें सरबन्धी नियमें गी होर सख्त कीता।
- भारत नै संयुक्त राष्ट्र सुरक्षा परिषद यानि यू.एन सिक्योरिटी काउंसल च संघर्ष सरबन्धित शारीरिक हिंसा दी कड़ी निंदा कीती, इसी युद्ध ते आतंकवाद दे थेआर दा रूप आखेआ।
- मौसम विभाग नै अज्ज उत्तराखंड च भारी बरखा लेई रेड अलर्ट दी चेतावनी जारी कीती।
- फीफा विश्व कप च अज्ज राती दुए क्वार्टर फाइनल च स्पेन दा मुकाबला बेल्जियम कन्नै होग।
- ते महिला क्रिकेट च भारत दा मुकाबला अज्ज संझा लंदन दे लाडर्स क्रिकेट ग्राउंड पर ऐतिहासिक टेस्ट मैच च इंगलैंड कन्नै होग।

<><><><><><>

IndianNewzealand Sports

भारत ते न्यूजीलैंड 2026 च खेड्डु सरबन्धें दे 100 बरे पूरे होने दा जश्न मना'रदा ऐ। हाकी जिन्नै 1926 च इस जाततरा दी शुरूआत कीती ही, अज बी दवें मुल्लखें गी कौल आहनना रदा ऐ। खेड्डु सरबन्धें दी शुरूआत 1926 च होई ही जदूं भारत सेना दी हाकी टीम न्यूजीलैंड दा दौरा करने आली पैहली भारती खेड्डु टीम बनी ही। महान मेजर ध्यानचंद होर बी उस ऐतिहासिक टीम दा हिस्सा हे जिनें इसी हाकी दे इतिहास दे सब्बनें यादगार अध्यायें च इक्क बनाई दित्ता। अज्ज 100 बरें बाद बी एह दोस्ती

लगातार बधा'रदी ऐ। इस साल दी शुुरुआत च भारती महिला हाकी टीम नै आकलैंड च खेड्डे गेदे फाइनल च मेजबान न्यूजीलैंड गी हराइयै एफआईएच वूमन्स नेशन्स कप जित्तेआ। हाकी न्यूजीलैंड दे साबका सीईओ ते 1976 दे ओलंपिक स्वर्ण पदक विजेता रमेश पटेल हुंदा आखना ऐ जे प्रधानमंत्री श्री नरेंद्र मोदी हुंदी इस जात्तरा कन्नै दौनें मुलखें बश्कार खेड्डे सहयोग होर मजबूत होगा।

<><><><><><>

### Govt. Drug Rules

केंद्र सरकार नै उनें दोआइयें गी लेइयै नियम होर मजबूत कीते न जिंदे च नशीले पदार्थें दी मात्तरा मती हुंदी ऐ। यानि सरकार नै औषधि नियम 1945 दा संशोधन कीता। सोआस्थ ते परिवार कल्याण मंत्रालय नै पैहले दिक्ती गेदी उस छूट गी खत्म करी दिक्ता ऐ जेदे तैहत एथिल एलकोहल आहली दोआइयें गी बनाने लेई लाइसेंस नेई लैना पौंदा हा। मंत्रालय राएं जारी कीती गेदी अधिसूचना दे मताबक 12 फीसदी थमां मते एथिल एंथनी आली सब्बने दोआइयां ते जिंदी शीशी 30 मिलीमीटर थमां मती मात्तरा च ऐ, उनें दोआइयें गी हुन शैड्यूल के च नेई कवर कीता जाह्ग। इनें दोआइयें गी बनाने जा बेचने लेई हुन ड्रग्स ते कास्मेटिक्स एक्ट 1940 तैहत लाइसेंस जरूरी होगा।

<><><><><><>

### VP Vande Mataram

उपराश्ट्रपति सी.पी राधाकृष्णन होरें अज्ज शिमला च स्थित भारती उन्नत अध्ययन संस्थान आई.आई.ए.एस आसेआ आयोजित स्थाई प्रदर्शनी 'वंदे मातरम:इक जात्तरा' दे उद्घाटन ते 'सरदार पटेल हुंदा नजरिया: एकीकरण, एकता ते संघवाद' विशे पर आयोजित अंतरराश्ट्री संगोष्ठी दे उद्घाटन सत्र गी वर्चुअल ढंग्गै'नै संबोधित कीता। उपराश्ट्रपति होरें आखेआ जे वंदे मातरम नै स्वतंत्रता सेनानिएं दी केई पीढ़िएं गी दलेरी, बलिदान ते नमिएं मेदे कन्नै प्रेरित कीता। उपराश्ट्रपति होरें सरदार वल्लभ भाई पटेल होरें'गी श्रद्धांजलि अर्पित कीती। उ'नें आखेआ जे सरदार पटेल होरें इक्क

राश्ट्र, इक संविधान ते सांझे राश्ट्री भविक्ख दा मजबूत नींह पत्थर रक्खेआ। उपराश्ट्रपति होरें नागरिकें गी गुजारश कीती जे ओह इकजुट, आत्मविश्वासी ते समावेशी भारत दे निर्माण दे धेइये गी मजबूत करन।

<><><><><><>

## CRSV

भारत नै संघर्ष सरबंधी शारीरिक हिंसा दी कड़ी निंदा कीती ऐ, इसी युद्ध दे हथियार, आतंकवाद ते समुदाएं गी बस च करने, असहमति गी दबाने ते मनुक्खी पीडा पुजाने आस्ते राजनैतिक दमन दे इक साधन दा इक रूप दस्सेआ ऐ। यू.एन च शारीरिक हिंसा पर संयुक्त राश्ट्र सुरक्षा परिशद दी खुल्ली बैहस च बोलदे होई संयुक्त राश्ट्र च भारत दे स्थाई प्रतिनिधि राजदूत पी. हरीश होरें आखेआ जे ऐसी हिंसा दंडमुक्ति दी प्रचलित संस्कृति दे बिच्च जारी ऐ ते भारत इंदी कड़ी निंदा करदा ऐ।

<><><><><><>

## IMD

भारती मौसम विभाग नै उत्तराखंड च भारी बरखा होने दी पेशनगोई कीती ऐ। विभाग दा आखना ऐ जे हरियाणा, हिमाचल प्रदेश, यू.पी, बिहार, सिक्किम ते उत्तर पूर्वी भारत समेत उप हिमालयी पच्छिम बंगाल च अगले दो दिनें दरान भारी बरखा होने दी मेद ऐ। आकाशवाणी कन्नै गल्ल करदे होई मौसम विभाग दे इक्क वैज्ञानिक डा. शशिकांत होरें दस्सेआ जे दिल्ली ते एनसीआर लेई अज्ज ते कल लेई मौसम गी लेइयै कोई चेतावनी नेई ऐ।

<><><><><><>

## Goa-ONOE

गोवा सरकार नै प्रस्तावित वन नेशन वन इलेक्शन पहल च अपना समर्थन दित्ता ऐ। मुखमंंत्री प्रमोद सावंत होरें आखेआ जे इस गैहू कन्नै सरकार गी विकास पर मता ध्यान केंद्रित करने ते बेहतरीन शासन सुनिश्चित करने च मदाद मिलग। गोवा सरकार नै इस मुद्दे पर परामर्श आस्तै गोवा च मजूद एक राष्ट्र एक चुनां यानि वन नेशन वन इलेक्शन आस्तै बनी दी संयुक्त संसदीय समिति गी अपना समर्थन दित्ता ऐ। मुखमंंत्री होरें आखेआ जे वन नेशन वन इलेक्शन कन्नै सरकारें गी घड़ी-घड़ी होने आली चुनां सरबन्धी गतिविधियें दे बजाय विकास पर ध्यान केंद्रित करने दा मौका थ्होग।

<><><><><><>

## US-Gulf

ईरान पर अमरीका दे ताजे हमले दी पच्छोकड़ै च राष्ट्रपति डानल्ड ट्रम्प होरें खाड़ी खित्ते च अमरीकी फौज दी कार्रवाइएं बारै इजराइल दे प्रधानमंत्री बेयांमिन नेतन्याहु हुंदे कन्नै गल्लबात कीती। इजराइल दे प्रधानमंत्री दफ्तरै मूजब दौने नेताएं जंदी रातीं टेलीफोन पर गल्ल कीती ते बक्ख-बक्ख खेत्तरें च तालमेल बनाने पर सहमति जताई। तोआई ईरान दी फौज नै दावा बन्नेआ ऐ जे उनें उत्तरी जार्डन च अमरीका दे वायु सेना ठिकाने पर 10 बैलिस्टिक मिसाइलां दागियां न।

<><><><><><>

## Monsoon

हिमाचल प्रदेश दे केई हिस्सें च मानसून दी गतिविधि बनी दी ऐ जेदे कन्नै केई क्षेत्रें च लगातार बरखा होआ'रदी ऐ। दक्खन पच्छिम मानसून हिमाचल प्रदेश दे शिमला, सोलन, सिरमौर ते राज्य दे बक्ख-बक्ख हिस्सें च इसलै सक्रिय ऐ जेदे कन्नै आम जनजीवन पर असर पवा'रदा ऐ। सिरमौर जिले दे पच्छाद च कल राती सबनें शा मती 207 मिलीमीटर बरखा दर्ज कीती गई। भारी बरखा होने करी नदिएं ते कानें दा जलस्तर बधी गेआ ऐ।

<><><><><><>

## Fifa-WC

फीफा विश्व कप च यू.एस बोस्टन च खेड्डे गेदे पैहले क्वार्टरफाइनल च फ्रांस नै मोरक्को गी 2-0 कन्नै हराइयै सेमीफाइनल च प्रवेश कीता। अज्ज राती दुए क्वार्टर फाइनल च स्पेन दा मुकाबला बैल्जियम कन्नै होग।

<><><><><><>

## Women's Cricket

भारती महिला क्रिकेट टीम अज्ज इतिहास रचग, जदूं ओह लंदन दे मन्ने-परमन्ने दे लाडर्स क्रिकेट ग्राउंड पर इंग्लैंड दे खलाफ अपना पैहला टेस्ट मैच खेडग। एहू लाडर्स च आयोजित होने आला हुनै तगर दा पैहला महिला टेस्ट होग।

<><><><><><>

## Whatsap-IT

सोशल मीडिया प्लेटफार्म-वट्सऐप नै यूजरनेम फीचर आली सुविधा गी लागू करने दे सरबंध्यै च भारत सरकार गी अपना जोआब सौंपी दित्ता ऐ। इलेक्ट्रानिक्स ते सूचना टेकनोलाजी मंत्रालय दे सूत्रें दस्सेआ ऐ जे मेटा दी मालकी आले वट्सऐप थमां जोआब कल राती हासल होआ हा ते मजूदा समें च एहदी जांच कीती जा'रदी ऐ। इस म्हीने दी पैहली तरीक गी सरकार नै भारत च वट्सऐप पर यूजरनेम फीचर गी लागू करने दे सरबंध्यै च मेटा गी नोटिस जारी कीता हा। सूत्रें मूजब, मंत्रालय नै मेटा गी एहू निर्देश दित्ता हा जे इस मामले पर सलाह-मशवरा पूरा होने तगर यूजरनेम फीचर गी लागू नेई कीता जा।

<><><><><><>

## Johsi Clean Energy

नमीं ते अक्षय उर्जा दे केंद्री मंत्री प्रल्हाद जोशी होरें अज्ज आखेआ ऐ जे लगातार दुई बारी स्वच्छ उर्जा नै मुल्खै दी 50 फीसद शा मती बिजली दी मंग पूरी कीती ऐ। इक सोशल मीडिया पोस्ट च श्री जोशी होरें दस्सेआ जे जंदी 6 जुलाई गी अक्षय उर्जा दे बक्ख-बक्ख स्रोतें थमां 50 इशारिया 2 फीसद बिजली आपूर्ति होई ऐ। उंनं इसी भारत दे स्वच्छ उर्जा तंत्र दी बधदी मजबूती ते विश्वसनीयता दा इक बड्डा सबूत करार दित्ता। श्री जोशी होरें आखेआ जे प्रधानमंत्री नरेंद्र मोदी हुं'दे नेतृत्व च भारत लगातार तेज रफ्तार ते मजबूत धेइये दे कन्नै टिकाऊ विकास गी अगगे बधा करदा ऐ।

<><><><><><>

## PM-Australia

प्रधानमंत्री नरेंद्र मोदी होरें आस्ट्रेलिया दी अपनी ऐतिहासिक ते महत्वपूर्ण सरकारी जात्तरा अधिकारिक तौर पर सम्पन्न करी लैती ऐ। इस जात्तरा कन्नै भारत-आस्ट्रेलिया व्यापक रणनीतिक सांझेदारी गी भविष्य दे मताबक इक नमीं दिशा ते मजबूत आधार प्रदान कीता ऐ। जात्तरा दे दरान दौनें देशें बश्कार कूटनीतिक, आर्थिक ते सुरक्षा सरबंध नमीं उंचाइएं पर पुज्जे। जात्तरा दी शुरूआत भारत-आस्ट्रेलिया मुख् कार्जकारी मंच थमां होई जित्थे कारोबार जगत दे प्रमुखें बरें 2022 दे आर्थिक सहयोग ते बपार समझौते कन्नै दपक्खी बपार च 55 फीसद दे बाढ़े दा सुआगत कीता। इस गति गी अगगे बधाने लेई प्रधानमंत्री मोदी ते आस्ट्रेलिया दे प्रधानमंत्री एंथनी एल्बनीज नै व्यापक आर्थिक सहयोग समझौते पर वार्ता च तेजी आहनने पर सहमति व्यक्त कीती। स्वच्छ उर्जा दे खेत्तर च बी दौनें मुल्खें ऐतिहासिक उपलब्धि हासल कीती। भारत गी आस्ट्रेलिया थमां लम्मी अवधि आली यूरोनियम आपूर्ति जकीनी बनाने लेई प्रशासनिक बवस्था गी खीरी रूप दित्तां जात्तरा दा सबनें शा प्रभावशाली जनसंपर्क कार्यक्रम मेलबन दे मार्वल स्टेडियम च आयोजित मेलबर्न मीट्स मोदी प्रवासी भारती सम्मेलन रेहा जेह्दे च तकरीबन 25 ज्हार लोक मजूद हे।

<><><><><><>

## PM-NZ

प्रधानमंत्री नरेंद्र मोदी होर अज्ज अपनी 3 दिनें दी जात्तरा दे खीरी चरण च आकलैंड पुज्जी गए न जित्थे उंदा न्यूजीलैंड दे प्रधानमंत्री क्रिस्टोफर लक्सन होरें बधी चढियै सोआगत कीता। न्यूजीलैंड दे प्रधानमंत्री लक्सन होरें आकलैंड दे ब्हाई अड्डे पर व्यक्तिगत रूप कन्नै भारती प्रधानमंत्री श्री नरेंद्र मोदी हुंदा सोआगत कीता। ब्हाई पट्टी उप्पर भारत दे न्यूजीलैंड सशस्त्र बलें दे प्रतिनिधि बी श्री मोदी हुंदे सोआगत लेई मौजूद हे। श्री मोदी होर अपने न्यूजीलैंड समक्ष क्रिस्टोफर लक्सन हुंदे कन्नै गल्लबात करंगन। दवें नेता दपक्खी सरबंध्यै दे पूरे दायरे दी समीक्षा करंगन जिनें क्षेत्रें च पिछले दो बरें दरान विशेष रूप कन्नै महत्वपूर्ण प्रगति दिक्खी गई ऐ, इंदे च बपार ते रक्षा शामिल ऐ। 40एं बरें च कुसै भारती प्रधानमंत्री दा न्यूजीलैंड दा एहू पैळला दौरा होगा।

<><><><><><>